

Ün di da cumpagnia a San Jon

■ **Als 25 avuost esa darcheu stat uschè inavant cha la Spitex ans ha invidats ad ün di da cumpagnia.**

Ouravant am staja a cour da far ün cumplimaint a tuot las persunas chi stan a la testa da quist'instituziun ed a tuot las collavuraturas e'ls collavuratuors chi praistan la lavur sco agüd chasan o sco fliamaint chasan. Per nus attempats es quai ün agüd inpajabel chi's dà la pussibilità da passantar eir nos vegls dis in chasa nosa. Be chi chi'd es aint in quella situaziun sa che cha quai voul dir e quant predschà cha quist agüd es.

Ed uossa ün cuort riassunt sur da nos inscunter. No'ns vain chattats sülla piazza da parcar avant la punt da Lischana. Da là davent eschna gnüts manats in autos privats sü San Jon. Là eschna gnüts retschavüts cordialmaing da *Men Juon*. Per nu sparmalar ad ingün interlasch eu da nomnar otras persunas per nom. Üna manadra ans ha dat il bainvgnü. Davo vaina gnü occasiun da salüdar a las preschaintas e'ls preschaints cuntschaints. Da star be stut quantas cliaintas e cliaints da la Spitex chi han pudü tour part a quist inscunter, natüralmaing cul agüd da las fich ingaschadas collavuraturas.

Davo passantà üna pezza davant il restorant e stüz la said eschna its aint illa sala ingio chi d'eira mis maisa per

nos jantar. Men cun seis personal ans vaiva preparà ün jantar stupend, sco cha nus eschan adüsats pro el. No'ns vain laschè gustar il stupend menü radschunand tanteraint insembel sur dals temps passats. Causa cha'l temp ans ha tschüf oura ans stan discuors sur dal temp da plü bod plü a cour.

Intant sun rivats eir ils musicants *Luis* e seis ami ed ans han tratgnüts cun musica da bal chi fa plü bain a nossas uraglias co musica dals sots moderns. Na da's dar da buonder cha alch preschaints han gnü il plaschair da ballar. Da star be stut cun che tact ch'els gjaiavan intuorn.

Intant d'eira il temp avanzà e sco üsità d'eiran prongs davant il restorant ils vitürins cun lur chavagls e charozzas. Che plaschair a pudair ir in charozza oura Bain Crotsch ed inayo. Natüralmaing cha'ls viandants s'han divertits sülla charozzas eir cun quintar passadas da rier. Il humor ha giovà eir là sia rolla. Ün uman sainza humor ais sco ün röser sainza rösas. Ün sincer ingrazchamaint a Men per sia nöbla gesta.

Ed uossa am resta amo dad ingrazchar a tuot quellas e quels chi'ns han dat la pussibilità da giodair quai bel di da cumpagnia. A revair.

Jachen Riatsch